

Inatsisartut aalajangiiffigisassaattut siunnersuut Inatsisartunut Siulittaasoqarfik partiit tapiissutaat pillugit inatsimmi allannguutissatut siunnersuummik saqqummiussinissaat Namminersorlutik Oqartussani ukiumut sipaaruteqartarnissaq aammalu partiit akunnerminni aningaasatigut naligiinngissuseq annikillissarnissaa siunertaralugu. Partiinut tapiissuteqartarneq pillugu inatsimmi allannguutissatut siunnersuuteqarnermi suliniutit uku ilaatinneqassapput:

- 1. Partiinut tunngaviusumik tapiissutit ukiumut 1 million kr.-mut qaffanneqassooq**
- 2. Qaffasinnerpaafissaanut killiliussaq atuutsinneqalissaaq taamaasilluni annertunerpaamik qinigaatitanut tapiissutigineqartartoq qinikkanut arfinilinnut killiliunneqarluni.**

Inatsit 1. januar 2024 atuutilersinneqassaaq

(Inatsisartunut ilaasortaq Jens-Frederik Nielsen, Demokraatit)

Inatsisartut aalajangiiffigisassaattut siunnersuut, Inatsisartut Siulittaasoqarfiat peqquneqassasoq siunnersuummik saqqummiussissasoq, Naalakkersuinikkut partiit ingerlatsisut naatsorsuutaasa tamanut saqqummiunneqartarnerat pillugit Inatsisartut Inatsisaat allanngortinneqarnissaannik1 taamaasilluni partiimut 10.000kr. sinnerlugu aningaasaliissuteqarsimanerme partiip naatsorsuutaanni kina aningaasaliissuteqarsimanersoq taamaallaat allaqqanani, kisiannili aamma aningaasaliissutit qanoq annertutigineri aamma allaqqasalerluni. Aningaasaliissutigineqarsinnaasullu killissarititaa avaqqunneqarsinnaassanngilattaq inatsisitigut pisussaataasunit arlaliusunit avinneqarsimalluni.

(Inatsisartunut ilaasortaq Jens-Frederik Nielsen, Demokraatit)

Akissuteqaat

(Inatsisartut Siulittaasoqarfiat)

Siullermeerneqarnera

Oqaluuserisassani immikkoortut uku marluk siunnersuutigineqannginnerini siulittaasoqarfik ilaasortamit saaffigineqarsimanngilaq, taamaattumillu suliassanut partiit allat isummeneri siulittaasoqarfiup ilisimanagit.

Inatsisartuni sulinermet atugassarititaasunik killiliussanillu allanngortitsinissanik siulittaasoqarfik peqquneqassatillugu tamatuma sapinngisamik partiinit amerlanerpaanit atituumillu naalakkersuinikkut tapersorsorneqarnissaa siulittaasoqarfiup pingaartippaa.

Suliassani partiit isumaat tusassallugit siulittaasoqarfiup qilanaaraa.

Siulittaasoqarfiup oqallinnissaq qilanaaraa Inatsisartullu oqallilluarnissaannik kissaallugit.